

第三十四冊
迷信

清稗類鈔

商務印書館發行

清稗類鈔

杭縣 徐珂 仲可

迷信類

男女之種種迷信

不辨事理之是非而妄信。曰迷信。國人鮮明科學。誕妄不經之言。自易入耳。且藉口於晚近西人之研究靈魂學。哲學家亦頗加以思索。乃不敢直斥其謬。更有引爲談助而資以消遣者。男子且然。何論婦女。特婦女之篤信左道者爲尤多。以至遺毒子孫耳。

迷信足補生計

徐新華曰。比戶之門。上已插薺菜花。清明插楊柳枝。端午插菖蒲。此雖社會之迷信。無足稱道。然貧民之負販爲生者。卽此數日間。於其生計。亦小有補助。不必故爲屏棄以絕其生計也。蓋敦養之道未至。一旦懸爲厲禁。則強者流爲盜賊。弱者轉於溝壑矣。

某氏婦多迷信

某氏婦。小家女也。少寡。獨與二子居。素信神怪。既寡。捨鞠育子女外。惟以長齋奉佛爲事。平日所詔其子者。不外迷信一途。如入夕。偶見燈之結蕊。則喜曰。將得佳音也。飲茶。見有葉挺立於杯中者。則曰。客將至矣。取而嚙之。更入杯。觀其仆否。以下來者之爲男子爲婦女。聞鵲噪。以爲將得幸福。乃祝其多鳴。聞鴉鳴。以爲將有禍殃。則唾之。兒不解。婦語以故。兒亦雀躍而前。以助其母之祝。與睡也。夜中或聞犬吠。兒驚呼以慰之。曰。勿聲。彼所吠者。非鬼。則空中之神也。兒恐。遂亦不敢出聲。

新春吉語

每歲元旦。老幼咸頌吉利語。謂一年可定終歲休咎。且有書而黏諸壁者。爲士者常書元旦發筆學有其益等語。爲商者常書新年提筆一本萬利等語是也。

陝人背爺過年

陝人至除夕。必出門。至十字路高呼曰。爺爺。我背你回去過年。於是以兩手向

後。作負物勢而歸。至中堂所供木主前。徐徐放下。再往背其奶奶。如前狀。往返數四。新鬼故鬼。依次背回。爺爺。祖父也。奶奶。祖母也。

讚土地

萍鄉有讚土地之俗。蓋歲首之事也。如某家接新客。

女婿初至岳家。謂之接新客。

某人逢壽

誕。固無論矣。卽無此二事。小康之家。或以讚土地爲無謂之慶賀。必先日具帖

報告當事者。謂來晚土地恭賀。

於新客則稱恭賀。於壽誕則稱慶祝。千秋。

至次日之暮。鑼鼓爆竹。

於新客則稱恭賀。於壽誕則稱慶祝。千秋。

以一人翻穿皮馬褂。飾爲有鬚。左手持杖。右手執扇。搖其頭。自讚曰。土地神。土

地神。土地原來天上人。並有種種慶祝之語。讚畢。酒肉徵逐。興盡而散。

竊花得婿

臺灣元夕。女子偷折人家花枝。謂將來可得佳婿。曰竊花。錢塘范九池有詩詠之。云。女郎元夜踏蒼苔。攀折青枝笑落梅。底事含羞佯不采。月明犬吠有人來。摸秀軋秀之得婿宜男。

科舉時代。江蘇之常州各屬院試。必於江陰。凡賃廡者。一衿旣青。門前屋角。必

有婦女於暗中牽襟弄裾。名曰摸秀。謂可得佳婿。兆宜男。又或於院試獎賞之日。小家新婦聯袂出遊。故與新秀才摩肩而過。則曰軋秀。

食瓜祈子

中秋夕。衡州有送瓜之俗。凡娶婦而數年不育者。則親友必有送瓜之舉。先數日。於菜園中竊冬瓜一個。須不使園主知。以彩色繪人之面目。衣服裹其上。舉年長者抱之。鳴金放爆。送至其家。年長者置冬瓜於牀。以被覆之。口中念曰。種瓜得瓜。種豆得豆。受瓜者設盛筵款之。若喜事然。婦得瓜。卽剖食之。三月初三日曰上巳。若是日適爲清明。江寧婦女之亟望生子者。必以野菜合瓜而煮食之。甚且謂嫠婦處女食之。亦可得弄璋弄瓦之喜。上海則異是。所食爲南瓜。且謂必須夫婦同食一瓜也。

撫鐵貓祈子

金陵城北鐵貓場有鐵貓。長四尺許。橫臥水中。古色斑斕。不知爲何代物。相傳婦人撫弄之。可得子。中秋夕。士女如雲。咸集於此。

投石卜男

禹廟在會稽山下。塑像拙陋。惟以較倉頡之四目肉角。已大勝矣。左偏有窆石。爲海內有數之古刻。一及春遊。無賴少年羣集亭上。以小石投之。穿其孔。謂可卜生男。孔卽當時下窆繫繩之孔也。

占花祈子

廣州祀金華夫人。祈子者以占得白花爲喜。有謠云。祈子金華。多得白花。三年兩朵。離離成果。

采青宜男

廣州元夕。婦女偷摘人家蔬菜。謂可宜男。名曰采青。花縣曾曉山照有詩云。籬頭雨歇溼游塵。弱柳緋桃解媚人。最愛蔬中冬芥好。年年生子及青春。

竊蒿苣生子

廣東婦女之艱嗣續者。往往於夜中竊人家蒿苣食之。云能生子。蓋粵人呼蒿苣爲生菜也。

賀人生子之奇

汴人喜早婚。尤盼早得子。若生男。必以雞鴨蛋贈戚友。蛋殼畫龜或便壺。以示添丁。戚友受而往賀之。必以五色油塗新兒父之面。且拉之游街。以示四方。謂有子爲榮也。

拂頭摩頂

藏人之謁達賴喇嘛班禪額爾德尼也。不論官吏平民。皆詣法座前脫帽合掌。伸舌於外。頂禮三度。垂手聚足。鞠躬屏氣。達賴班禪或以手拂其頭。或以手摩其頂。則以爲至榮。

舐穢水

藏人家庭以夫爲主體。妻敬禮之若君上。夫或有遠行。妻必於前一夕爲夫洗足。卽置其穢水於牀下。旣行。妻每夜向穢水叩首至再。以指染水而舐之。夫歸始罷。若違此習慣者。鄰里皆目爲不賢。

硃紅染牲毛

青海蒙女之歸寧也。若與壻偕。則必攜有硃紅之染料。徧染牲畜之毛。晝不及。則繼以夜。必染至無一遺。是歲牲畜乃安。婦翁以壻爲能。卽以雙羊染紅。送其夫婦歸。

鏡聽

鏡聽不必學而能。非方伎也。古人之爲之者。每於除夕或新歲。先事洒掃。置香燈於竈門。注水滿鐺。置杓於水。虔禮拜祝。撥杓使旋。隨柄所指之方。抱鏡出門。密聽人言。第一句卽是卜者之兆。今則惟於除夕出門。在道路中聽人之言。以決休咎而已。

黃文僖鏡聽

大學士黃文僖公機。錢塘人。爲秀才時。效鏡聽之舉。嘗於除夕游行里巷。方出門。卽聞某家婦詢某姑曰。家有二雞。一黃雞。一白雞。今日宰白雞乎。宰黃雞乎。姑曰。宰黃雞。杭人俗諺。謂殺爲宰。本古義也。黃歸而大喜。頗自負。蓋雞與機同音。宰爲宰相之宰耳。已而果應其言。

徐健庵昆季鏡聽

崑山徐健庵尙書乾學昆季三人。未第時。除夕相約鏡聽。乃翁偵知之。先走匿門外。俟三子之出。揖而前曰。恭喜弟兄三鼎甲。三子知翁之戲已也。不顧而走。會有二醉人連臂而來。甲拍乙之肩而言曰。癡兒子。你老子的話是不錯的。蓋以俳語相戲也。已而果應其言。

兄弟鏡聽

益都鄭氏兄弟皆文學士。大鄭早知名。父母過愛之。二鄭落拓。不甚爲父母所喜。遂惡次婦。後次婦望二鄭捷。竊於除夕以鏡聽卜之。有二人初起。相推爲戲。云汝也涼涼去。是科鄭兄弟皆捷。

又有兄弟二人。將於翌年春應童試。先於除夕鏡聽。牆畔植一梯。升梯可遙聽鄰家人語。其兄先登。囑弟勿遽上。弟不得已。於梯下徘徊。鄰家適作佛事。道場散後。羣兒喧嚷於佛座旁。一婦將獻佛之果。爲羣兒分之。兒有不及待而躍至桌上攫取者。婦大呼曰。先上來者不得。在下者有之。兄聞之。懊喪而下。弟亦懜

然罔覺也。其後弟獲售。兄被黜。

竈卦

廣東永安縣除夕守歲。婦人祝竈。置鹽米於竈上。以碗覆之。視鹽米之聚散。卜年歲之豐歉。男子則置水一碗於鍋旁。黏東西南北字。中浮小木。祝竈者。視木端所向。聽其有何聲響。以占休咎。名曰竈卦。亦古人鏡聽之類也。

擲琰

擲琰。一作擲筊。以兩蚌殼投空擲地。觀其俯仰以斷休咎。亦有以竹或木。略斲削使如蛤形爲之者。盡人可能。非方伎家也。

求籤

神廟有削竹爲籤者。編列號數。貯以筒。祈禱時。持筒簸之。則籤落。驗其號數。以紙印成之。詩語決休咎。謂之籤詩。並有解釋。又或印有藥方。五代盧多遜幼時。就雲陽道觀讀書。見廢壇上有古籤一筒。競往抽取。是知以抽籤爲卜。古已然矣。

王文簡求籤

京師前門甕城之關廟籤。夙稱奇驗。順治己亥。王文簡公士禎方在都謁選。往祈籤。初得籤云。君今庚甲未亨通。且向江頭作釣翁。玉兔重生應發跡。萬人頭上逞英雄。又云。玉兔重生當得意。恰如枯木再逢春。爾時殊不解。是年十月。得揚州推官。以明年庚子之任。在揚五年。以康熙甲辰十月內遷禮部郎。所謂庚甲者。蓋合始終而言之。揚郡瀕江。故曰江頭也。然終未悟後二句之所指。至庚申閏八月。擢國子監祭酒。乃悟玉兔重生之義。

韓文懿求籤

長洲韓文懿公葵未第時。嘗祈籤於蘇州之靈巖山寺。有功名須到五門知句。不解所謂。及鄉試策題之問字。皆誤作門。自不覺也。是科中式。康熙癸丑。成進士。魁天下。歷官至禮部尙書。頗存綸閣之想。會直省解鄉試卷至。閱所對策。率多蕪濫。私念少時闡作。將毋類此。因命吏檢視。見五門字。不禁啞然。且悟籤語。無遠志矣。

徐逸少求籤

康熙己未。徐逸少編修方與計偕。瀕行。禱於大乘庵。得一籤。其後二語云。今日杏園沈醉後。聲聲報道狀元歸。徐大喜。意謂必當掄元也。及榜發。則是科一甲一名。乃常熟歸允肅也。然徐亦捷南宮。授庶吉士。

王雲錦求籤

金匱王殿撰雲錦。嘗於康熙庚午。舉南闈。至丙戌。以年已五十。不欲與計偕。乃求籤於關帝廟以決之。籤有五十功名志已灰。誰知富貴逼人來二句。大喜。乃北上。遂捷南宮。大魁天下。

秦澗泉求籤

秦澗泉殿撰大士。將散館時。求關帝籤。得靜來好把此心捫之句。意鬱鬱不樂。以爲神嗤其有虧心事也。已而試松柏有心賦。限心字爲韻。終篇忘點心字。閱卷者仍以高等上。高宗閱之。問心字韻何以不明押。秦俯首謝罪。而閱卷者亦俱拜謝。上笑曰。狀元有無心之賦。主司無有眼之人。

蔣景求籤

嘉慶甲子。江南鄉試。長洲蔣廣文景曾於關帝廟求得一籤。有句云。自南自北。自西東。及入場。首題爲謹權量至四方之政行焉。其文之後比。卽用此句。對股以無黨無偏無反側七字儷之。主考以經語現成。密圈批中。

畢秋帆籤識

畢秋帆制軍沉於乾隆庚辰會試前。詣正陽門關帝廟求籤。見首句君今庚甲未亨通。頗不悅。然竟以第一人及第。蓋君今庚甲四字。已示先機也。

鄧小山毛養梧求籤

關聖帝君籤有前三三與後三三之句。鄧小山教授雲倬爲諸生時。嘗祈得之。乾隆癸卯鄉試。中三名。閱十年。爲癸丑會試。中九名。毛養梧主政繡虎亦於嘉慶己酉鄉試。祈得之。是科中三十三名。道光壬午會試中式。亦三十三名。未幾歿於京邸。年三十三歲。又一士子祈得是籤。則中六十六名。

張惕齋求籤

錢塘張惕齋太守與仁款慧媚學。道光辛丑成進士。入詞垣。改刑部。擢御史。出典廣東鄉試。京察一等。授建昌守。履任半載。以繳照遲延。部議鐫級。大吏奏留以勞績復官。檄攝袁郡。將之任。病歿。年五十有九。惕齋於散館前。在正陽門關帝廟求籤。有云。常把他人比自己。管須日後勝今朝。以爲可留館也。及改刑部主事。始悟常把他人。蓋庶常屬他人。刑爲比部。屬諸己也。編檢七品。而主事則六品。勝今朝。亦驗矣。

恩藝棠求籤

恩藝棠中丞銘出撫安徽。瀕行。求籤於正陽門之關帝廟。得一籤。有舟中敵國笑中刀勾。方審視。忽憶葉名琛督粵時。亦得此。乃曰。吾其死於疆場乎。已而爲道員徐錫麟轟以手槍。遂斃。錫麟爲恩之屬吏。是舟中敵國也。錫麟夙爲恩所契。事恩惟謹。是笑中刀也。

儒醮

湘中士子仿倣僧道之誦經。以孔孟之書編而誦之。曰儒醮。

誦太陽經

三月十九日。固明思宗殉難日也。當時諱之。而謂之曰日誕。於是迷信者皆沿之。是日。有齋沐者。輒凌晨而起。誦太陽經。若是日天晴。則曰神喜而受人之祝也。或陰晦。則曰神胡不喜。乃卻人齋供也。

香客求福

凡詣廟燒香之男女。俗曰香客。各省皆有之。今姑言江浙。則江寧之清涼山。有所謂磕頭香客者。行三步。磕一頭。必入廟而後已。句容之茅山。淮揚徐海之人。且皆至。杭州之天竺。寧波之普陀。嘉興湖州蘇州松江常州之人。且皆至。固無不以求福免禍爲祈禱也。

假喫三官素

俗傳三官菩薩有大量。持齋者不忌葷腥。但須不食特殺之物。故有假喫三官素之諺。

拜愿

宣化府人於五月十三日。爲父母妻子或己身疾病。具香紙牲醴於城隍廟拜禱。自其家門且行且拜。至廟乃止。謂之拜愿。

蒙人轉經

蒙人奉佛惟謹。木輪中貫鐵樞。可轉動。集梵經輪間。大者支木架。以手推之。小者持而搖之。旋轉如風。謂一轉有一功德也。

藏人以經典爲護符

藏人之護符。以絲束經典一頁。或置之金屬小匣。藏諸懷。其旅行者。以馬及金剛繫犬兩種畫品替之。遇猛犬。謂攜金剛繫犬圖可免。遇暴風雨。謂飛散畫馬之紙可免。又有咒語。且有藏護符於家者。以佛像之衣服。或所持孔雀羽。包以魔紙。纏以毛線。以狗毛山羊毛捻成更以獼鼠皮包其全部。謂可祈家族之興隆也。

藏人周行騰吉里湖

西藏有騰吉里湖。在拉薩西北。藏人以周行此湖爲哥拉。謂易消滅罪障。雖犯殺人罪者。以哥拉二回得贖之。雖殺父母者。以三回得爲無罪。一周此湖。當費

八日。多或十二日。每歲各方信徒結羣巡拜者。絡繹不絕。

轉格欄

拉薩宮殿之廊壁。悉繪佛像。瞻仰者輒以頭摩之。故黑而生光。宮殿內外道路皆石砌。信徒匍匐過之。以頭貼地爲最敬。是以石膩如油。宮殿周七里。巡行一周。曰轉格欄。謂可祈福除災。婦女輒於午後。羣向轉格欄一周。每行三步。卽伏地。口誦經語。叉手於頂。右手持牛骨。向頭上一畫。起行三步。復如前。數日方一週。積計之。有三十餘里。

熬茶

蒙人重佛教。嘗遣人赴西藏禮達賴喇嘛。謂之熬茶。

轉世錢

青海有所謂轉世錢者。不論家產多少。以其半爲佈施。輸送本族之僧寺。餽貽過境之高僧。且遠投西藏之大寺。喇嘛不敢卻。代藏之。其人曰。喇嘛有天賜之衣食。不屑用俗人財帛。來世仍還本人。絲毫不差。寄少者來世錢少。寄多者來